

**Constituziun da**  
**L'Apvieniba dals Ciumisas Glhepeascas**  
ratificada sür li 17. Mai dallas 2007

---

**I. Principais Xhenerais**

1. **Nómina.** La nómina dal Apvieniba c'è l'Apvieniba dals Ciumisas Glhepeascas, eda, in l'Angleasca, «*The Association of Talossan Language Organisations*».
2. **Cunpoçaziun.** L'Apvieniba qomsista dals organiçaziuns-membras es dals altras perziuns (cunseglheirs) qi sint zedicheschti à l'útzil del glhep Talossan.
3. **Tocas.** Las tocas dal Apvieniba sint:
  - a. À parpagarh l'útzil del glhep Talossan.
  - b. À grùltiçarh la visivalità es promotarh la reputaziun del glhep starp els glhepen dal tzara.
  - c. À ò anauçarh la cuntravalaziun starp las Ciumisas zedicheschti àl glhep Talossan.
  - d. À promotarh dal buna forma in el glhep scrit es parlat.
  - e. À minimiçarh la separaziun del glhep ainciùn dels dialectici underschidlec'hs.
4. **Neutralità.** Parç qe las tocas da l'Apvieniba sint dal filoloxhà, l'Apvieniba mamtenençarha dal neutralità ariguard dels politici es naziunalità.

**II. Membrità**

5. **Afilieirs.** Las laínas dal afiliaziun cùn l'Apvieniba sint:
  - a. **Organiçaziuns-Membras.** Ingen organiçaziun qi'st devotada àl promoziun, l'útzil, eda l'estudia del glhep Talossan tenadra estescu cuncebada àl Apvieniba. Organiçaziuns nouas tenadrent esteshti cuncebadas àl Apvieniba par el consént ünanimös dals organiçaziuns-membras corentici.
  - b. **Cunseglheirs.** Dels individuals qi non sint membreux dad ingen organiçaziun-membra mas cùn qi l'Apvieniba desiradra à consultarh över las facendas regardeascu el glhep tenadra estescu invitat à ò afiliarh cùn l'Apvieniba in el titreu d'iens cunseglheir avetz el consént ünanimös dals organiçaziuns-membras corentici.

6. **Cupas dals Organiçaziuns-Membras.** Cadascu organiçaziun-membra aßumarha acestilor cupas:
  - a. Àð encoraxharh dals organiçaziuns altras, privätsilor eda públíci, da din ça Romançada à consultarh cün ça (à'iensa organiçaziun dal intereçù públicüm) över el tiffinagh es l'interpretaziun gramatical dals públicaziuns es la creaziun dal nomenchiatüra oficial in el glheþ es els mocts níefs neceßaes per l'útzil d'acestilor organiçaziuns eda verbands.
  - b. À promotarh l'útzil corect del glheþ Talossan, par ops del preßeu es ingen avalità dal pubblicità.
  - c. À reportarh greidourmint à l'Apvieniba toct i mocts níefs qi sint auservats eda adoptats par l'organiçaziun, es ingen reformaziuns gramaticais, speliçais, eda del altreu natür glheþesc qi sint endorçadas par l'organiçaziun-membra.
  - d. À públícarh 'n notiçieir periodic eda à mhíus viensa renunçaziun areasca per asigürarh 'n report dels activaes es dals afcastaziuns dal organiçaziun-membra.
  - e. À comtribuçarh àl redactaziun dal renunçaziun areasca dal Apvieniba.
7. **Autonomica.** Cadascu organiçaziun-membra put separh, sanc limitaziuns, ça constituziun es regleux, in concordançù avetz las nurmas fundamaintschais d'aceasta constituziun da l'Apvieniba, avetz las modificaziuns apropiätsilor per las circonstanças locals da, es specifici à, l'organiçaziun.
8. **Resignaziun.** Ingen afilieir dal Apvieniba put resignarh dal Apvieniba à ingentemp par comunicind la resignaziun àl Fosteglh dal Apvieiba.
  - a. El Fosteglh refuçadra à reconéiçarh la resignaziun d'iensa organiçaziun-membra txusca qe l'organiçaziun asigüradra dal evidençù, aceitaval àl Fosteglh, qe la resignaziun füt aprovada par l'organiçaziun-membra in concordançù cün ingen procederançeux q'estadrent resquirats par la Constituziun dal organiçaziun-membra.
  - b. Ingen afilieir qi failadra à comunicarh cün l'Apvieniba pr'iens pieriot da sex mesen, es ingen organiçaziun-membra qi failadra àð atquescharh cün regleu 6d d'ürant ingen anneu del calendriereu serà presümat à tirh resignat dal Apvieniba.

### **III. La Cumiziu**

9. **Pürpös.** La Cumiziu dal Apvieniba c'è l'organ da cuntravalaziun starp las organiçaziuns-membras dal Apvieniba.
10. **Cunpoçaziun.** La Cumiziu qomsistarha d'iens cumiziuneir da cadascu dals organiçaziuns-membras, es ingen conseglheirs qi çoiçadrent à partiçiparh in las raisnas dal Cumiziu.
11. **Fosteglh.** El Fosteglh dal Cumiziu serà selectat inzialmint par sort dels cumiziuneirs dals organiçaziuns-membras es conseglheirs volontaes. El Fosteglh perservarha pr'iensa stanea da sex mesen. Àl cuncludaziun dal stanea, el Fosteglh apüntarha sieu succeßoreu da starp els cumiziuneirs dals organiçaziuns-membras es conseglheirs volontaes, mas aucün perziun d'iensa organiçaziun estadra çoiçada per perservarh 'n stanea salva qe 'n cumiziuneir da cadascu dals altras organiçaziuns-membras corentici tiennent perservat come Fosteglh pü dacuort qe ingen perziun da sieu organiçaziun. El Fosteglh qi zesparta l'óifisch perservarha com'el Vice-Fosteglh d'ürant qe la stanea del Fosteglh noveu, es rompliarha àls deveirs del Fosteglh quand c'estadra neceßar.
12. **Funziuns.** Las funziuns dal Cumiziu sint:
  - a. À stimularh es à ð ilesnarh la comunicaziun starp las organiçaziuns-membras es la cuntravalaziun da lor activitaes.
  - b. À colabourarh cün las organiçaziuns-membras per rompliarh las tocas dal Apvieniba, es à propoçarh dels iniceatius qe promotadrent aceasta cuntravalaziun actiu.
  - c. À ð avisáivarh periodicmint dals organiçaziuns-membras över sieu activitaes, es à reportarh à cadascu organiçaziun över las activitaes dals altras.
  - d. À püblicarh la renunçaziun a resc dal Apvieniba, qi asigüra dals noticias regardeascu dals activitaes dal Apvieniba es dals organiçaziuns-membras.
  - e. À rompliarh àls tasc'has altras qi estadrent requesteschti par las organiçaziuns-membras qi non sint ziscunvenénts cün aceasta constituziun.
  - f. À ð adoptarh ingen resoluziuns neceßaes per rompliarh sieux deveirs es tasc'has, in las sianças rapladas par el Fosteglh in acord avetz els procedançeux dal Cumiziu.
13. **Procedançeux.** La Cumiziu adoptadra dels procedançeux internais, cunsistent avetz aceasta constituziun, par la vota dal maxhorità.

### **IV. Amendamentschen**

14. Ingen affilieir dal Apvieniba put propoçarh dels amendamentschen à ceasta constituziun, es ça serent refereschti àls organiçaziuns-membras par 'n vota dal maxhorità dal Cumiziu. Dels amendamentschen serent institutats quand qe ça tiennent estescu ratificats par doua tierçéux dals organiçaziuns-membras.